

## Prolegomena.

---

### A. De pondere, thermometro, pondere specifico.

Pondera, quibus medici in medicamentis praescribendis, et pharmacopoeae in medicamentis ad usum medicum dispensandis uti debent, haec sunt:

Kilogramma, quod continet	10 Hectogrammata.
Hectogramma.....	10 Decagrammata.
Decagramma .....	10 Grammata.
Gramma.....	10 Decigrammata.
Decigramma.....	10 Centigrammata.
Centigramma .....	10 Milligrammata.

In Svecia et Norvegia eadem ponderis ratio rata erit, ubi novae Pharmacopoeae, quae nondum absolutae sunt, publica auctoritate comprobatae erunt.

---

Longitudinis mensura in Dania usitata haec est:

Cubitus, qui continet	2 Pedes.
Pes .....	12 Pollices.
Pollex .....	12 Lineas.
Cubitus .....	0,6277 Metros Gallicos.

Mensura longitudinis Gallica, quae ad specimina describenda in Pharmacopoea Danica adhibetur, haec est:

Meter, qui continet	10 Decimetros.
Decimeter.....	10 Centimetros.
Centimeter.....	10 Millimetros.
Meter.....	3,1862 Pedes Danicos.

---

Thermometrum centum graduum sive Celsius ad gradum caloris constituendum in Pharmacopoea Danica adhibetur.

---

Pondera specifica calore 15 graduum in Pharmacopoea Danica definita sunt.

---

Sveci et Norvegi eodem thermometro eademque temperatura ad pondera specifica definienda utuntur.

## B. De partibus vegetabilibus colligendis, siccandis, servandis.

Nisi alia ratio praescripta est, hae regulae observandae sunt:

Omnes plantarum partes, quantum fieri potest, e plantis in nostra patria sua sponte nascentibus potius quam e cultis colligendae et diligenter siccandae sunt. In receptacula lignea vel vitrea vel porcellanea vel metallica immissae plane comprimendae sunt et, receptaculis probe clausis, ita servandae, ut quum insecta tum lux, humor pulvisque ab iis arceantur. Ne sint mucidae neve cariosae; prospiciendum est, ne colorem, odorem, saporem proprium amiserint.



**Rhizomata, Radices, Tubera** aut vere colligenda sunt, foliis nondum evolutis, aut auctumno, planta marcescente. Aqua communi frigida celeriter abluta et a partibus alienis adhaerentibus purgata siccentur, stratis non densis expansa; si succulenta et crassa sunt, e filis suspensa siccentur aut in loco aëri pervio et umbroso, aut leni calore adhibito.

**Cortices** e plantis non nimis vetulis nec nimis novellis colligendi sunt; iisdem anni temporibus, quibus Radices, colligantur, potissimum tamen verno tempore, eodemque modo, quo Radices, siccentur, sed lavatione omissa.

**Folia et Herbae** tempestate sicca colligantur eoque tempore, quo maxime se evolverunt, plerumque ubi florere coeperunt; tum stratis non densis expansa ut Radices quam celerrime siccentur.

**Flores** tempestate prorsus sicca colligantur, postquam se evolverunt; collecti summa diligentia ut Folia siccentur.

**Fructus et Semina** permatura colligantur et probe siccentur aut in loco aëri pervio et umbroso, aut leni calore adhibito. Fructus Papaveris, antequam arescere incipiat vel antequam permaturuerit, decerpendus est.

### C. Praecepta operationum quarundam et praeparatorum.

Nisi alia parandi ratio praescripta est, haec observanda sunt:

**Pulveres.** Substantiae in pulverem redigendae primum ab omnibus partibus alienis adhaerentibus vel immixtis purgentur et, adhibito calore  $60^{\circ}$ — $65^{\circ}$  non excedente, caute siccantur, prius, si opus est, concisae vel alia ratione comminutae. Deinde, substantiis in mortario vel alia ratione contritis et in cribrum operculo fundoque instructum immixtis, pulvis quassatione secernatur. Pulvis secretus probe commisceatur et, si opus est, iterum caute siccetur, tum in vasis probe siccatis servetur, a luce, humore, partibus pulverulentis, quae in aëre insunt, remotus. Partes remanentes substantiarum vegetabilium abjiciendae sunt. Parvam tantum copiam pulverum ex substantiis organicis paratorum servare licet.

**Concisa.** Concisio ita instituatur, ut omnes partes eadem fere sint magnitudine; partes pulverulentae cribro secernantur. Parvam tantum copiam partium vegetabilium concisarum servare licet.

**Decocta** ita parantur, ut substantiae praescriptae concidantur vel grosse pulverentur, deinde cum copia Aqvae communis ebullientis sufficienti in pyxidem stanneam vel cupream stanno obductam vel porcellaneam, quae operculo accurate claudi possit, immissae commisceantur; tum, pyxide probe clausa et in balneo aquae collocata, per tertiam partem horae igne leni et continenti coqvatur; quo facto, massa adhuc calida expressione coletur, deinde liquor per aliquod tempus loco frigido seponatur, ut partes turbantes subsidant, et decantetur. Ne affundatur major copia Aqvae, quam quae requiratur ad copiam Decocti praescriptam parandam. Si copia Decocti justo minor est, residuum cum tanta copia



Aqvae communis ebullientis commisceatur, ut pars, quae desit, expleatur, tum massa iterum coletur et decantetur.

Ex singulis (1) partibus substantiae denae (10) partes Decocti parandae sunt, sed si Decoctum concentratum requiritur, quinae (5) partes parandae sunt. Si Decocta substantiarum narcoticarum aut heroicarum paranda sunt, copia earum in formula medica definienda est. Parentur ex tempore.

**Electuaria** ex tempore parentur, tamen copias perparvas Electuariorum, quae saepe requirantur, in vasis probe clausis loco frigido servare licet.

**Emulsiones** ex tempore parentur.

**Infusa.** Nisi alia parandi ratio praecepta est, substantiae praescriptae concidantur vel grosse pulverentur, deinde in vas stanneum vel cupreum stanno obductum vel porcellaneum, quod Aqua bullienti infusa antea calefactum sit, immissae justa copia Aqvae communis ebullientis perfundantur et, operculo confestim imposito, inter agitationem saepius repetitam per quartam partem horae digerantur; quo facto, massa expressione coletur, deinde liquor seponatur, ut partes turbantes subsidant, et decantetur. In copia Aqvae et substantiarum definienda regulae, quas in Decoctis commemorandis supra exposuimus, observandae sunt. Ex tempore parentur.

**Maceratio** fiat, calore  $15^{\circ}$ — $25^{\circ}$  adhibito, inter agitationem vel quassationem saepius repetitam.

**Digestio** fiat, calore  $35^{\circ}$ — $40^{\circ}$  adhibito, inter agitationem vel quassationem saepius repetitam.

Filtratio ita instituat, ut liqvores per chartam bibulam puram, albam, glutinis expertem in infundibulo tecto transmittantur. Aqva communis sive fontana coqvenda, refrigeranda, filtranda est, priusquam in receptura ad Solutiones vel Mixturas parandas adhibetur.

Medicamenta, qvorum praeparatio in Pharmacopoea exposita est, itemqve omnes substantias vegetabiles vel animales et concisas et contusas et pulveratas pharmacopolae ipsi in suis officinis parare debent aut providere, ut per alios ibi parentur. Si opus fuerit, aliunde ea arcessere poterunt, sed ab altero pharmacopola, qvi et ipse praeceptis legum nostrarum custodiaeque publicae subjectus est; ipse vero utiqve qvalitatem medicaminum praestare debet.

Quantum fieri potest, prospiciendum est, ut omnia instrumenta et vasa ad medicamenta paranda et servanda adhibita ea sint materia, qvae medicamentis non tentetur.

Omnia medicamentorum receptacula signo Latino ad legendum facili instructa esse debent. Receptacula pharmacopoliorum, qvae in posterum condentur aut denuo instituentur, nominibus officinalibus Pharmacopoeae usitatae signanda erunt.

#### D. Praecepta nonnulla, qvae in medicamentis dispensandis observanda sunt.

1. Omnia medicamenta secundum praeepta Pharmacopoeae aut formulae medicae accurate paranda sunt, neque pharmacopolis suo arbitrio quidquam mutare aut addere aut omittere licet, qvo medicamentorum color pulchrior aut sapor jucundior aut vis major fiat.



2. Eorum medicamentorum, quorum et meliora et deteriora genera in mercatura occurrunt, pharmacopolis meliora sola habere et dispensare licet. Si idem medicamentum et crudum vel venale et depuratum vel purum vel rectificatum in pharmacopoliis prostat, pharmacopolae medicamentum crudum vel venale ne dispensent, nisi medicus diserte hoc praescripserit.

3. Eorum medicamentorum, quae eodem nomine designantur, sed vi differunt, debiliora semper dispensanda sunt, nisi medicus nominatim fortiora praescripsit.

4. Medicamenta semper ponderibus dispensanda sunt, numquam mensuris, nisi medicus hoc diserte praescripsit.

5. **Pilulae.** Ad Pilulas formandas substantiae solidae non adhibendae sunt nisi pulveratae. Si praeceptum medici ejusmodi est, ut massa pilularis ex substantiis praescriptis confici non possit, pharmacopolae aut Aqvam destillatam aut Syrupum Sacchari aut Spiritum dilutum aut Spiritum concentratum aut Radicem Althaeae pulveratam addere licet et Pilulas ita formare, ut, etiamsi pondus earum paullo majus fiat, numerus tamen idem sit, quem medicus aut diserte praescripserit, aut eum praescribere voluisse consentaneum sit. Si pondus Pilularum in formula medica non definitum est, statuere licet, eum voluisse, ut singulae Pilulae centena vicena milligrammata substantiarum omnium nominatim praescriptarum continerent. Nisi medicus aliud praescripsit, Pilulae Lycopodio conspergendae sunt. Pharmacopolam substantiam ejusque copiam, quam sua sponte addiderit, in formula medica significare oportet. Pilulae, quae substantias volatiles

contineant aut humorem ex aëre facile attrahant, in vasis vitreis probe clausis dispensandae sunt. Pilulae ex tempore formentur.

6. **Pulveres** volatiles aut humorem ex aëre facile attrahentes in vasis vitreis probe clausis dispensentur. Singulae eorum doses ponderatae in suam quaeque capsulam ex charta cerata confectam immittantur.

7. Signa medicamentorum dispensatorum in charta alba notanda sunt, si medicamenta usui interno inserviunt, in charta caerulea, si externo usui inserviunt.

---